

四庫全書

史部

欽定四庫全書

史部

世宗憲皇帝聖訓卷十五

二五

臣 永瑤 恭 校

編修臣 裴謙 覆勘

總校官原任中允臣 王燕緒

校對官中書臣 王 瓚

謄錄監生臣 徐步青

欽定四庫全書

大清世宗敬天昌運建中懷正文武英明寬仁信毅大孝
至誠憲皇帝聖訓卷十二

敦睦

康熙六十一年壬寅十二月壬子

上諭宗室覺羅人等

皇考至仁至厚恩篤宗支凡宗室覺羅大罪薄懲小罪寬
免歷年無十人及於刑辟者必不得已乃令圈禁朕思

皇考時問罪圜禁之人原不應釋放祇以現遇恩赦姑與寬宥伊等當念身係宗室覺羅須閉戶家居安分靜守慎毋怙過不悛再罹重罪

雍正元年癸卯正月丙申

上以莊靖親王博果鐸薨欲親臨祭奠諸王大臣等懇請停止

上諭曰王大臣等所奏雖是但朕之長輩止有莊親王一
人宗親誼篤朕心必欲親往著宗人府並有執事之王

大臣等隨往

十一月辛丑

上諭王大臣等怡親王於

皇考時敬慎持身廉潔立品未嘗圖利干預一事糾黨邀
結一人所屬人員略無擾累其安分自守家計空乏舉
國皆知朕素崇獎自朕御極以來一心戴朕克盡臣弟
之道所交事務悉効公忠亦衆所共知也查從前朕弟
兄分封之例總計各得錢糧二十三萬兩朕欲援此例

賜之王奏辭不已朕勉諭再四僅受十三萬兩而已再
照裕親王例令支官物六年王又叩首固辭極其懇切
朕欲以王之善表揚於衆且為後日子孫模範故特諭
諸王大臣今不允王之所請既不可得允王所請則超
軼尋常實心為國宣力之弟轉不得以諸弟兄應得之
分賜之朕心實為不忍著諸王大臣議奏

乙巳

上諭王大臣等前將怡親王奏摺交王大臣等議奏王又

屢次奏辭力求允其所請朕尚難於酌定想王大臣等
自難定議今俱著照所請以副王謙抑之懷朕另行加
恩將現在王所兼管之佐領俱令為王之屬下賞給一
等護衛四員二等護衛四員三等護衛十二員加賜豹
尾槍二長桿刀二每佐領下添給親軍二名以此加恩
於王即遵旨行

雍正二年甲辰正月甲午

上諭總理事務王大臣等朕御極以來加恩文武官員各

得陞階而宗室獨無仕進之路朕欲施恩予以陞階思之再三總不可得如用伊等為大臣等及侍衛猶可供朕使令若用部院或遇屬下人為大臣難以行走勢必至瞻徇情面若令其應鄉會試與民人一體搜檢恐失觀瞻可否補用宗人府官員筆帖式之處爾等傳與宗人府議奏再宗室內有學優才美者作何考選之處亦著議奏

閏四月戊寅

上諭宗學正教長輔國將軍善福等朕惟睦族敦宗務先
教化嘗見宗室中習氣未善各懷私心互相傾軋並無
扶持愛護之意惟知寵厚妻黨姻婭其於本支骨肉視
若讐敵殊為悖謬或因祖父昔日微嫌追念舊惡必圖
報復即如齊正額行事無狀甘蹈匪僻以致重干法紀
王貝勒之子孫安自尊大任意奢侈不顧禮義陷於罪
戾者往往有之其將軍及閒散宗室不知自重狎比小
人蕩盡先人產業者尤為不少昔我

皇考加恩宗室養育栽培撫恤備至苟有片長薄技靡不收錄如普奇經希勒什亨等皆曾擢用伊等不思感恩酬德反要結朋黨專事鑽營大負

皇考委任之意且其居家素行亦多乖戾又如賴士不安本分蕩產破家及其贖罪軍前仍不改過生事訐告此皆宗室中之可為炯戒者朕嘗歎明代宗室年久繁衍失於訓教末流猥鄙至不可言誠恐朕之宗室日流日下不知前鑒深用為憂是以亟籌保全之道若非立學

設教鼓舞振興循循善誘安能使之改過遷善望其有成今特立義學揀選爾等教習宗室爾等隨其資質勸學興行導以禮義夫教訓之方漸摩陶淑非可責效旦夕也但須盡心竭力善為開導毋避怨毋倦怠教習久而禮義明自當遠惡從善或有不遵教訓罔顧廉恥有玷名教者小則爾等自行懲戒大則揭報宗人府會同奏聞其行止端方精勤好學者無論年齒長幼即行保奏從來立教之術莫要於獎善懲惡善不獎不能使之

勸惡不懲不能使之改爾等既膺簡任其各平心靜氣
屏除私意教訓宗室子弟如己之子弟懇懇然無毫髮
不盡其心所頒諭旨令其朝夕記誦如木鐸之警衆俾
皆覺悟自新庶幾積習可除翕然嚮化以協休風爾等
務期勤慎黽勉恪供厥職以副朕篤厚宗親殷勤教育
之至意

五月己巳

上諭宗人府王府佐領分出之人編設佐領令其兄弟子

姪管理尚可若以旗分之人湊集編設佐領令其兄弟
子姪管理朕意以為非宜雖係兄弟子姪亦各有定分
宗室等豈可將他人之定分占據乎凡此等處應行區
別宗室為鎮國將軍等職乃伊等分內之事一為佐領
竟成諸王之屬下矣其宗室覺羅佐領惟朕可以役使
若王等門下以供使令王等既難自安且多掣肘之
處理應置之公中令在上三旗行走况閒散宗室內亦
有統轄旗分佐領者王公理宜統轄屬下閒散宗室豈

宜統轄屬下乎似此者亦應撤出置之公中王等果能為國宣力著有嘉行朕自將佐領添增賜給再公等之長輩宗室陵侮幼輩擾累伊等屬下之人視為泛常公等亦不能相抗任其所為其屬下人等念係本公宗族之長亦不便於首告或千百之中僅有一二發覺耳其無辜受累者甚多伊等行輩雖卑亦係統轄屬下之人若恃其輩長而陵侮之可乎擾累其屬下之人又可乎將此著宗人府一併詳議具奏

十二月壬午王大臣等奏二阿哥病勢不起

上諭曰前看守之王大臣奏聞二阿哥病症朕即下旨與王大臣於太醫院擇良醫調治昨者少愈二阿哥披誠陳奏感激朕恩殊為可憫今日醫云病復變重朕欲往看恐二阿哥執為臣之禮俟有事後朕再往奠前二阿哥福金事既照親王福金辦理若二阿哥有事亦應照親王之例辦理一切所用之物交與內務府大臣莊親王常明米保等俱於內府取給理郡王所屬人等俱著

穿孝即傳諭令其預備二阿哥之子孫交與總管太監多派人照看從前

皇考時大阿哥福金曾派在內阿哥穿孝如二阿哥有事著誠親王公允禔長子弘曙弘暉弘曦弘昉弘春弘昂穿孝照親王例齊集時值隆冬福金及大臣之命婦免其齊集著擇定出殯日期送至鄭家莊設棚安厝令伊子弘皙得盡子道出殯時每翼派領侍衛內大臣各一員散秩大臣各二員侍衛各五十員送至鄭家莊

甲申王大臣等以二阿哥患病溘逝

皇上降旨親往致祭合詞懇請停止

上諭曰王大臣勸朕雖是但朕心不能自己之處爾等尚未盡知二阿哥獲重罪於

皇考其身若在乃係負罪之人今既薨逝則罪案已畢依然朕之兄也從前裕親王歿時

皇考自熱河回京躬臨致奠朕之弟兄俱著穿孝今封二阿哥為親王即與裕親王無異朕登大寶以來於二阿

哥處未降一旨未遣一人雖錫賚頻加皆未言及朕所
頒賜惟交與總管太監傳送蓋朕心不欲受伊拜謝並
不欲聞伊感恩之言也前日聞伊病篤朕遣大臣往視
二阿哥奏曰臣蒙皇上種種施恩甚厚臣心實深感激
又訓伊子理郡王曰爾若能一心竭誠効力以事君父
方為令子等語此皆二阿哥至誠由衷之言朕今往奠
乃兄弟至情不能自己並非邀譽也明日朕必往奠王
大臣不必再奏

雍正三年乙巳三月辛亥諸王宗室等以建立宗
學具摺謝

恩

上諭曰書云以親九族九族既睦爾等宗室之內自應和
協彼此保護骨肉之親豈可相為讐敵乎朕在藩邸時
雖知宗室惡習但孔子云不在其位不謀其政又云非
天子不議禮不制度不考文朕今即位教育愛護宗室
俱係朕躬職分之前朕議處蘇努吳爾占之罪伊等

並非與朕舊有隙怨祇以骨肉之內彼此傾陷互為讐敵一有微隙可乘羣起而攻之則其人何所容身乎今我宗室內互相讐陷之習皆由蘇努所致凡讐當解不當結所謂九世之仇必報者指敵國而言之耳非言宗族骨肉也以骨肉而信下人無影響之言彼此視為讐敵反與旁人相親豈非輕重倒置乎今朕宗室僅千餘人尚不及十佐領人數若如此互相傾陷何所底止朕甚惜之惟望爾等習為善人爾宗室內不但同心協力

報效國家之人為朕所深眷只安靜守分不干法紀之人即在朕眷注之中若妄行犯法朕必照例處分豈可望朕之寬宥乎爾等為立宗學之故謝恩如以朕設立此學果為有益爾諸王宗室之子弟或在家庭讀書亦可或勞其身心閱歷事務令入宗室學中讀書亦可惟令教習等嚴加訓誨爾等又時加約束自可望其成就若溺愛袒護己子反怨教訓之人何由望其成立耶爾眾宗室等聽朕此旨實心奉行各自勉勵或學習經

書或嫺熟武藝宗族骨肉內彼此扶持各守本分無貽羞辱如果學習數年文武兩途有幾人成材則朕心喜悅如獲奇珍庶此學之設不為虛矣再宗室子弟之成丁者宜各自黽勉嚮學至於鼓舞振作之勤則在爾宗人府王貝勒公等如數年中各自勤學誠得幾人成立彼時不但爾等謝朕之恩朕且舉行筵宴以誌歡慶總之宗族骨肉之間以和為貴爾等勉旃

雍正四年丙午七月辛亥

御書忠敬誠直勤慎廉明匾額賜怡親王

上諭大學士九卿翰詹科道等曰朕自即位以來怡親王
事朕克殫忠誠至純至恪事事為朕實心辦理而朕委
任之處甚多約畧舉之職掌之大而且繁者有九議政
關係機密戶部掌領度支三庫總理出納興修畿輔水
利以厚民生管領漢侍衛以育人材至於諸王子之事
務舊邸之事務以及督領圓明園八旗守衛禁兵養心
殿監理製造鉅細事件皆一人經畫料理而怡親王公

爾忘私視國事如家事處處安帖能代朕勞不煩朕心
蓋其忠君親上之念肫懇篤摯是其忠也小心兢業無
纖毫怠忽是其敬也精白一心無欺無僞是其誠也直
言無隱表裏如一是其直也黽勉奉公夙夜匪懈即如
目今王雖身抱疴疾而案牘紛紜披閱不倦朕聞之實
至於不忍是其勤也一舉未嘗放逸一語未嘗宣漏是
其慎也清潔之操一塵不染是其廉也見理透徹莅事
精詳利弊周知賢愚立辯是其明也是以朕特書忠敬

誠直勤慎廉明八字賜之惟朕深知王之德洞悉王之心覺此八字實不能盡其美善亦無一毫過量之詞若有一字不確不切是朕之頒賜非嘉獎之詞乃譏諷之語矣朕不爲也且朕賜此八字乃就怡親王事朕之大端而言至於王之當年侍奉

皇考極盡誠孝深蒙

皇考之慈愛而其居心之方正秉性之和平待人之寬厚遇下之仁惠種種善行筆不勝書朕觀爾等在朝諸臣

卷十二
於忠勤慎明四字尚多有之若敬誠直廉四字朕則未能輕許向後咸當奮勉砥礪以副朕望

雍正六年戊申二月丙戌

上諭宗人府果郡王為人直樸謹慎品行卓然朕即位以來命王辦理理藩院及三旗事務數年王矢志忠誠毫不顧及已私執持正理槩不瞻徇贊襄朕躬允稱篤敬王微有弱疾雖偶爾在家調養而一切交辦事件仍然盡心料理今承我

聖祖皇考六十餘年至聖至神化洽宇宙之恩普天共享
昇平固無庸似昔年諸王効力於行間朕以為若能盡
心為國備極忠誠恪守臣子恭順之道其人為尤勝其
事為尤難著將王晉封親王為朕之子弟及世世子孫
之表範

雍正七年己酉閏七月癸未

上諭王大臣等向來覺羅佐領或有或無俱未畫一今既
將下五旗覺羅佐領由各該王屬下撤出作為公中佐

領朕意均派八旗方為妥協前者宗人府設立宗學祇令教習宗室未及覺羅覺羅人衆今若一槩歸併宗學教者勢難遍及應每旗各立一衙門管轄覺羅或王或公派委一員統理令其於各該旗覺羅內揀選老成練達品行端方者一二人分管即於該旗衙門之旁各設一學除情願在家學習者外擇其可教之人令其讀書學射滿漢兼習所派出之管轄人員不時訓誨稽察如內有行止不端不知守法安分者即回明宗人府王等

令在該旗衙門居住學習禁止出門俟其改行遷善之後再許出門年底彙疏具題如此則於覺羅少年子弟大有裨益而人人皆可成就著宗人府王公等會同滿洲大學士六部尚書詳悉議奏

雍正八年庚戌五月甲戌

上諭內閣朕因怡親王薨逝中心悲慟雖強自排遣而飲食俱覺無味寢臥皆不能安蓋王之事朕誠敬忠愛之心八年有如一自自古以來無此公忠體國之賢王則

朕所以待王之禮亦應在常例之外今朕素服一月以稍展思慕不釋之情此一月之內朕既素服則在廷諸臣遇朝服之期亦著仍穿常服一切宴會俱不必行凡朕加恩於王之處皆不足以酬王之碩德豐功而在朝之諸王大臣官員等受國家之恩必念國家失此賢王同深悲痛昨日朕親臨奠醊之時見滿漢文武諸臣悲切之狀人有同情朕心甚慰益見王之素行感人者深也

丙子

上諭內閣怡親王忠孝性成端方清直當年事我

聖祖皇考敬謹恪恭克盡子臣之道深蒙

皇考慈愛而王慎密有加小心安分此中外所共知者逮
朕御極之初命王總理事務王夙夜匪懈公爾忘私精
白一心無欺無隱其殫竭忠誠贊襄於密勿之地者八
年有如一日至於軍務機宜度支出納興修水利督領
禁軍凡宮中府中事無鉅細皆王一人經畫料理無不

精詳妥協符合朕心無煩朕之指示其有關於吏治民生之利弊有聞必奏每語必詳而為國家保護善類培養人材一片篤摯真切之念形於寤寐王之懿德美行從不欲表著於人而人亦無從盡知之朕即知王最深而亦口不能宣筆不能述也是以雍正四年特書忠敬誠直勤慎廉明八字以賜彼時降旨朕深知王之德洞悉王之心覺此八字實不能盡王之美善不過就王事朕之大端而言耳蓋王實能佐朕治安天下朕實賴王

翼贊昇平徧觀自古史冊所載賢王懿戚從未有可與
王比倫者且王居心之和平公正行事之寬厚仁慈皆
足以享遐齡而綿壽算豈意王遽舍朕而溘然長逝耶
自去年冬月王抱病以來朕縈於懷無刻稍釋商確醫
藥默禱

神祇以冀沉疴頓起乃今醫藥罔效祈禱不靈天何奪我
忠誠輔弼之賢王若此之速耶王抱恙時居住交暉園
與圓明園相近朕間欲親往看視王再三懇辭而於一

旬半月之間必力疾入圓明園與朕相見及王病勢漸加力不能支惟恐朕心憂煩則稱交暉園乃起病之所暫且移避遂養疾於西山無非欲與圓明園相遠令朕不深悉其病狀可以安慰朕心也及王回城中府第朕以祈雨回宮前月得雨之後王屢次奏請朕幸圓明園是王但恐以病狀煩勞朕心而於己身之生死全不計及也及聞病勢沉篤朕方欲命駕臨視乃王聞知即脫塵而去蓋王不欲以永訣傷朕之懷是以顯此剛決之

相其於去留之際明白超脫若此在王成一忠孝正直
賢智慧覺之全人而朕頓失此柱石賢弟感痛悲哀何
能自己耶王之德行功績難以枚舉從來豐勲偉烈必
膺國家崇報之典惟王為

聖祖皇考之令子為我朝

列祖之功臣允宜配享

太廟列於從前建立大功諸王之次庶與王之功德相副
且可上慰

列祖

皇考在天之心而朕思念悲切之衷亦可稍解於萬一其餘一切恩卹典禮該部會同大學士九卿悉心詳察從優定議具奏

丙戌

上諭內閣怡親王為朕辦理大小諸務無不用心周到而於營度將來吉地一事甚為竭力殫心從前在九鳳朝陽山經畫有年後因其地未為全美復於易州泰寧山

太平峪周詳相度得一上吉之地王往來審視備極辛
勤又恐隨從人等煩擾居民將飲饌之屬俱不令前驅
預備常至昏夜始進一餐其所擇吉壤實由王親自相
度而得而臣工之精地理者詳加斟酌詢謀僉同且以
為此皆王忠赤之心感格神明是以具此慧眼卓識也
其相近山水迴環形勢聯絡之處又有中吉次吉之地
朕以王經營吉地實為首功欲以中吉者賜之王驚悚
變色惶懼固辭朕鑒其誠心遂寢其事已而在六十里

外涿水縣境內得一平善之地曰此庶幾臣下可用者
奏請賜給朕彼時遲回未曾降旨王於病中令侍郎劉
聲芳懇切轉奏朕不得已允其所請王得旨喜極至於
踴躍忭舞云皇上待我隆恩異數不可枚舉今茲恩賜
則子孫世世俱受皇上之福於綿長矣即日遣護衛前
往起土越數日護衛呈看土色王取一塊捧而吞之蓋
王知朕眷王之深惟恐瑩域未定將來仍以前所欲賜
之地賜之也其用心之謙謹周密至於如此王薨逝後

朕詢問王府管事之人知王病中將身後之事一一指示特畫親王墳塋圖一幅與其王妃及諸子曰我身後塋地之制悉照會典所載親王之禮行毋得稍有踰越如或稍過則汝等違我之治命矣昨王府之人以圖進呈朕覽僅有門三間享堂五間此國家經常之制非所以待有大功之賢王者但思王之生平謙抑退讓朕每加恩禮王必再四懇辭朕鑒其一一實皆出於至誠往往俞允今若身後獨不從其言朕心有所不忍然以豐

功碩德不世出之賢王而寢園僅循常制則褒德顯功之典禮實為缺畧朕心又有所不忍今如何使朕心之輾轉不忍者得以大慰而揣度王心亦受之而安且揆之於禮適為合宜允協著大學士九卿等悉心詳酌定議具奏

六月丁未

上諭大學士等從前怡親王常在朕前奏稱白家疇一帶居民忠厚善良深知感激朝廷教養之恩今王薨逝而

彼地居民人等感念王之恩德欲自備資本建立祠宇
歲時致祭輿情懇切足徵王之遺愛在人而民風醇厚
亦即此可見朕心深為嘉悅欲將白家疇數村地丁錢
糧永遠蠲免以為將來祭祀香火之資竝使良民均霑
恩澤爾等確議具奏

辛酉大學士等議奏怡親王瑩制

上諭曰怡親王有遺言身後殯殮只用常服一切金玉珠
寶之屬槩不可用王妃及諸子遵其遺言只以常服為

殮即平日所束之帶亦未曾用朕親臨其喪亦祇以血
淚巾帕及所佩香囊附棺中示含玉之意誌永訣之哀
蓋王天性節儉一生服食之需愛惜物力不肯多費絲
粟故拳拳於身後如此且識見高明深凜古人寶玉送
死之戒即此一節其器量過人遠矣是以附身附棺之
物皆從其遺言不忍違其素志至於園寢之制則關係
國家之典禮德懋懋官功懋懋賞乃古今之通義恐非
朕所得私亦非王所可讓者今大學士九卿等酌古準

今詳明定議悉與典禮符合甚愜朕懷著依議行

大清世宗敬天昌運建中表正文武英明寬仁信毅大孝
至誠憲皇帝聖訓卷十二

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷十三

用人

康熙六十一年壬寅十一月庚戌

上諭大學士等朕惟敷政之道用人為先開門籲俊之典
由來尚矣然知人則哲自古為難朕在藩邸不與朝臣
往來所以內外大小官吏皆不能晰知今荷

皇考大行皇帝命承大統臨御之初簡用人材爾諸大臣
皆久蒙

皇考知遇任以股肱茲值

梓宮在上靈輿式憑爾等哀感交迫之時益當各竭忠蓋
仰報高深內而大臣以及閒曹外而督撫以及州縣或
品行端方或操守清廉或才具敏練者爾等各據真知
灼見從公具摺密奏古人云內舉不避親外舉不避讎
爾等果矢公忠以人報國或素日同僚共事或同鄉同

年或門生親戚子弟俱准保奏勿避嫌疑勿徇私援黨
勿沽名市恩勿輕聽風聞勿言過其實有一於此則上
負

皇考任用之恩又負朕諮詢之意矣

皇考遺命囑朕篤愛懿親保全臣下數十年來聖明之世
本不容有姦貪昭著之人朕所需者人材但當有舉無
劾毋得修怨陷害爾等具摺或滿字或漢字各須親寫
不可假手於子弟詞但達意不在文理字畫之工拙其

有不能書寫者即行面奏至於政事中有應行應革能裨益國計民生者果能深知利弊亦著各行密奏朕自即位以來用人行政若有闕失亦宜直言勿隱朕之諄切詢問者一則急欲得人以資治理二則欲知朕行事之當否三則觀爾等所舉之人及所奏之事便可知爾等之居心制行矣

雍正元年癸卯二月丙寅

上諭六部尚書侍郎等各部屬員既各分司則各有職守

彼此不得干預况每司滿漢共有六員不可謂辦事無人若皆關冗貪庸何難指名題叅另易其人安用他司越俎代庖乎此明係錯營包攬為漁獵之計嗣後不論何司不論滿漢永遠不得借才能之名一人兼攝數司之事若有緊要事件暫時派出指辦一二事尚可

三月乙酉

上諭吏部各省督撫衙門事繁非一手一足所能辦勢必延請幕賓相助其來久矣但幕賓賢否不等每有不肖

之徒勾通內外肆行作弊黜陟屬員則清濁混淆申理
獄訟則曲直倒置敗督撫之清節誤督撫之功名彼則
置身事外飽橐而去殊屬可恨夫今之幕客即古之叅
謀記室凡節度觀察等使赴任之時皆徵辟幕僚功績
果著即拜表薦引彼愛惜功名自不敢任意苟且嗣後
督撫所延幕客須擇歷練老成深信不疑之人將姓名
具題如効力有年果稱厥職行文咨部議敘授之職位
以示砥礪該部詳議具奏

四月甲子

上諭直隸各省督撫國家敦勵風俗首重賢良舉髦士以
勸秀民實為政教之大端凡封疆大吏宜共體此意廣
詢博訪不可視為具文漫不加察也前所頒恩詔內有
每府州縣衛各舉孝廉方正暫賜以六品頂帶榮身以
備召用一條距今數月未有疏聞豈通都大邑之中海
澨山陬之遠遂無潛修砥操克稱俊乂可應詔旨者歟
誠恐有司怠於採訪雖有端方之品無由上達殊負朕

殷殷延攬之至意特著直省各督撫速遵前詔確訪所屬果有行誼篤實素為鄉黨所推者即列名具奏毋得隱蔽及濫引塞責

十月辛亥

上諭總理事務王大臣等部院筆帖式食俸僅二十八兩不及一護軍領催之錢糧而伊等樂於供職者冀有陞轉之途也伊等既有陞轉之途若概與加俸恐伊等不知鼓勵轉不竭力嗣後各部院筆帖式著各堂官及該

管之人將伊等內謹慎無過又或辦事勤敏或寫本精工或善於繕稿者於年終分別保奏此保奏之人如何照伊等品級增添俸銀或另行加恩之處朕再降旨

乙丑

上諭大學士等國家建官分職於翰林之選尤為慎重必人品端方學問醇粹始為無忝厥職所以培館閣之材儲公輔之器也從前

聖祖加意育才循循訓導又纂修各種書籍需員甚多故

翰林院編檢幾至二百人庶吉士亦五六十人朕臨御之初未有編纂諸事又未能如

聖祖之善於訓導誠恐人才置之閒散特多方錄用內而科道吏部外而道府州縣俱各隨材器使務令疏通今編檢尚有百餘人庶吉士尚有數十人著內閣大學士會同翰林院掌院教習秉公別擇其學問優長字畫端楷或精於繙譯國書者留本衙門辦事及派各館纂修其或才具練達可當科道吏部之選或長於吏治編檢

可為道府庶吉士可為州縣者一一分別具奏至或老
病衰廢願自解退者聽其以原官休致其有行止不端
事蹟確實者奏聞革退今朕特恩開科人材輩出將來
揀選庶常朕當親加考試引見揀選至日後散館仍照
舊例以三等分用目今正屆殿試之期朕深知向有擬
送策聯鑽營甲第等弊殊可痛恨朕所點閱卷大臣俱
係平日實心委任之人各宜虛公謹慎杜絕諸弊倘有
仍蹈前轍者必嚴加處分務使文治日隆英才蔚起以

副朕籲俊興賢之至意

十二月辛亥

上諭八旗都統等向者每甲喇止設叅領一員因不敷用始委署一員協理昨議政大臣奏稱護軍校驍騎校等官以之委署叅領職卑不勝其任應停其委署等語朕加以酌量將委署叅領改作副叅領秩為五品嗣後副叅領員缺仍將護軍校驍騎校等官一併揀選引見補用若叅領副叅領奉有差遣其員缺應行委署者奏聞

委署如此則責任專而管轄得力由兵丁出身者其陞轉之途亦不致壅滯旗下既得人材辦理事務亦大有裨益至現在委署叅領應分別優劣優者授為副叅領劣者令其各回原職

雍正二年甲辰三月庚辰

上諭吏部兵部朕命各省督撫提鎮將所知官員保題特以要缺須得人辦理耳若其人著有勞績陞任別省者概不肯令赴陞任仍復題留本省殊未允協夫天下一

體豈得各分爾我嗣後如係水師營緊要員缺仍許題請外餘俱不許題留

八月己丑

上諭吏部國家分理庶績務在得人道府州縣等官尤屬要職其有才幹素著廉潔自持者倘不得以時上聞何以示勸著於各省道府同知通判州縣等官內總督保奏三員巡撫保奏二員布政使按察使各保奏一員將軍提督亦屬本省大員將所知者亦令保奏一員俱各

密封保奏不得會同商酌此保奏內不必將朕特用之
員塞責朕特用人員有才守兼優者不拘人數亦另摺
奏聞俟朕降旨調取之時再令來京引見如保奏不當
日後劣蹟敗露將保奏上司一併治罪

雍正三年乙巳三月甲寅

上諭吏部月選道府州縣等官於地方民生最為切近與
其甄別於既仕之後不若詳慎於未仕之前是以我
皇考特重其事每於月官銓選之後令九卿詹事科道驗

看凡有出身不正素行不端之人各將所知據實陳奏而九卿等每多瞻徇莫肯抒誠及朕臨御以來屢降明諭務令直陳無隱乃仍循舊習瞻顧懷私係同鄉則畏避嫌怨係別籍又謂不能確知如此殊非慎選官方之道也嗣後月官掣缺之後九卿照例驗看但九卿人少不能周知竝令各部院衙門堂司官將所知漢人內有出身不正行止不端者各具密摺於月官考履歷之日至乾清門進呈其有品行素優者亦令密奏若係旗員

則令本佐領叅領都統副都統亦照此例各具密摺奏聞倘有挾讎誣奏者朕參閱衆論自能洞悉諸臣亦斷不能欺朕也如此則不肖倖進之徒皆知儆畏名器不致濫邀矣

六月庚寅

上諭吏部外任官員迴避本族例俱赴京另補朕思督撫兩司及統轄全省之道員其族人迴避者自應赴京另補若分巡數府之道員及知府同知通判知州等官所

轄之地無幾其屬員職分卑微若必一例赴京另補未免往返稽延艱難拮据深可軫念嗣後遇此等應行迴避之員著該督撫即於本省內調補如此則屬員既遵本族迴避之例而又無另補守候之苦於公私均為有益爾部即遵諭行

十月己巳

上諭果郡王允禮順承郡王錫保八旗漢軍內有平居孝友守分讀書之人考試既不獲中式而又不能別就者

爾二人查明分別挑選其上三旗包衣旗鼓佐領下人
令內務府總管保奏其王等包衣旗鼓佐領下人令各
該王保舉如此則人不致於壅滯而亦可得才能之選
矣

雍正四年丙午六月丙寅

上諭吏部三年舉行大計所以激濁揚清整飭吏治必舉
劾之間至公至當方足以昭勸懲之典查定例卓異人
員俱送京引見而叅劾人員則聽候部院議奏不行引

見此中或有冤抑及避重就輕等弊亦未可定嗣後大計之年除貪酷之員既已指明劣蹟叅奏無庸再行引見外其餘叅劾等官該部照例處分出缺其應作何送京引見之處九卿詳議具奏

己丑

上諭諸王大臣等從古帝王之治天下皆言理財用人朕思用人之關係更在理財之上果任用得人又何患財之不理事之不辦乎朕即位以來推心置腹以待爾等

大臣時時諮訪務得人才共襄庶政爾大臣等亦各有
所保薦以備任用朕深嘉之但知人自古為難而保人
更非易事知人者不過知其才具豈能知其存心保人
者亦祇能保其目前豈能保其異日是以朕曲加體諒
從不苛求但公私二字所關甚重不可以不辨而公中
有私私中有公尤不可不時時警省也即如始初見其
人善而舉之既舉之後其人改操易轍即當據實奏聞
倘以為從前既舉而自護其短為之掩飾彌縫此則公

中之私也或始初因朋友故舊之情而舉之既舉之後時時警戒提撕相責以善一聞其聲名不好或即行檢舉或密奏以聞此則私中之公也爾諸大臣每一人所舉多者不過二三十人平時訪察其行為勸勉其廉謹或有居官不善即行叅奏不稍回護如此則人人有所忌憚爭自濯磨國家可收得人之益爾等亦不愧以人事君之義矣又如爾等大臣各有子弟居官為父兄者同列於朝情關朋友豈不望其有成然與其私受囑託

庇護朋友之子弟使子弟有所恃而不肯努力上進何如切加教導使其儆惕玉之於成若大臣子弟既有父兄之訓迪又有堂官之督率則成人者必多國家豈不甚樂有世家大族之子孫而用之哉總之朕之優待爾大臣與其遷官賞賚不若成就爾之名節為一不朽之人爾等之於朋友及薦舉之人與其結以私恩小惠護其過愆而喪其人品何如以大義相規使之為端人良吏永保令名至於家庭之間訓導子弟又不待言矣勉

之戒之

七月丁酉

上諭吏部道府等官有表率屬員之責必得賢能諳練之員方於地方事務不致貽誤朕慎重官方雖州縣等官皆審酌補用而於道府尤為加意非審知其人材識足以勝任者不輕試用捐例候選人員初任者多於地方事務從未經歷一旦畀以道府驟膺民社未必遽能稱職及至不稱職時督撫糾叅反受黜革情亦可憫嗣後

凡係捐例候選道府人員俱著補授各部郎中令其學習辦事至應陞道府時令各該堂官保送引見

己亥

上諭吏部朕從前曾下諭旨各省道府州縣之居官好者命總督保舉三人巡撫保舉二人提督布政按察二司各保舉一人密封具奏不得互相商議原以通省人才不少保舉多者不過二三人少者僅一人諸臣於所素知者各拔其尤自然精確督撫提督布按二司皆朝廷

大吏受國家深恩自應體朕為天下得人之意不徇私情秉公薦舉乃其中竟有挾私妄舉者及來京引見俱極庸陋殊非人臣以人事君之義今各員俱已引見爾部可再行文與各省督撫布按二司除從前曾經密舉及朕特旨補授各員外督撫暨布按二司各於道府州縣中明舉一人不得雷同督撫自行題奏布按二司咨呈爾部文到日爾部即繕摺具奏被舉之州縣官員並令給咨來京引見保舉之道府官員不必來京如有挾

私任情草率濫舉者朕必從重治罪斷不姑容

雍正五年丁未二月乙亥

上諭河南巡撫田文鏡據奏請將候選州縣分撥各省學習以裨吏治此議朕於踐阼之初業經思及因難以施行遂寢而未發蓋自古迄今大抵中材居多欲求出類拔萃之賢世不屢覩故理國之道貴儲才有素首先以厚風俗為要務風俗既端斯趨向有方而人材蔚起不特科甲輩學古入官即一切旗漢人員無不講求經濟

吏治民生豈盡茫然莫喻但恐其居心不肯恪秉公忠以奉乃職耳若慮以民社為新進後生所嘗試之具粵稽舜典明試以功車服以庸已啟後世科資循格之端是以地方外吏全賴守封疆者激揚公正糾舉精明正所謂三載考績黜陟幽明也至云新選者少則數月多則經年安保其無害於民今學習之員不令攝事無由覈驗優劣委令署理彼僉邪小人之為害於民又獨不然乎況督撫諸臣雖簡命自朕未必一皆公爾忘私或

稍涉夤緣則大啟奔競其弊有不可勝言者不寧惟是
即朕現今用人之法亦止堪暫行一時將來自仍歸於
聖祖疇昔銓衡之成憲朕緣目擊官常懈弛吏治因循不
得不大示鼓勵以振作羣工委靡之氣俟咸知奮勉治
行改觀時朕另有裁處又據奏朕超擢教職為州選舉
生員為縣雜職亦准卓異試觀如是甄拔才堪入彀者
能得幾人此亦出於偶爾旁求非可永遠循行之良策
所以吏兵兩部向年舊例悉仍舊貫未命更張一二間

遇督撫越例題請補授亦俱令聲明原委朕降特旨允行蓋有深意存焉豈俾輕紊成憲而致一代典章混淆無序哉

三月丁未

上諭吏部會試舉人著爾部揀選引見併問九卿將所知者舉出再舉人內有伊等同鄉素日推服之人亦著舉人公舉或數人共舉一人或十數人共舉一人俱將姓名註明務須有猷有為有守之人方可推薦不得冒濫

閏三月乙丑吏部遵

旨會同九卿揀選下第舉人引

見分發各直省以州縣委署試用

上諭曰守令乃親民之官關係百姓之休戚故得其人則民生被澤而風俗日淳不得其人則民生受累而風俗日薄自古安民必先察吏此不易之經也朕御極以來夙夜孜孜欲使薄海之內無一夫不獲其所而此願一時難遂者則以縣令之不能盡得其人也果能得有猷有

為有守之人布散各省分膺民社之寄彼一人之精神
力量足以貫注乎一邑凡督撫大吏耳目心思之所不
能徧及者縣令皆能體察經理之則民生安得不厚風
俗安得不淳而朕心無一夫不獲之願於是乎可遂矣
向來各省縣令多循資按次照例選用之員故其中庸
碌無能者有之年力衰憊者有之少不更事者有之以
致苟且因循貪位竊祿諸事闕冗職掌廢弛此等之人
尚不能顧一身之考成豈能為地方之憑藉乎今因會

試後天下舉子齊集京師朕思其中必有才品兼優之士是以特加遴選畀以縣令之任朕之所望於爾等者不僅在於辦理刑名徵收賦稅了簿書期會之責而已必須實盡父母斯民之道視衆庶為一體剛柔相濟教養兼施化澆薄而為醇良懲僉邪以安善類古稱愛民如子此語最宜體會父母愛子之心未有不教之以正者縣令果視民如子豈有優柔貽害姑息養姦行婦人之仁忘聖賢之義而可謂之恫癘保赤者乎書經曰罔

違道以干百姓之譽自古聖賢為治皆尚實政最惡虛名若時存沽名市惠之心必至為同流合污之鄉愿又何能為整綱飭紀之良吏乎從來父子之間施者不以為恩受者竝忘其感守令之於民果能潛移默化使閭閻習為固然而泯其感頌之迹斯不愧父母之稱而媲美古之循良矣紳士居鄉倘有違理肆行之處令有司約束勸導之者無非欲其同歸於善竝非令地方官有意摧折之也爾等蒞任後於紳士之品行端方者則當

加意敬禮以樹四民之坊表其小有過愆者則勸戒之
令其悛改其不可覺悟不可寬宥者則置之於法以警
其餘如此則賞罰公明輿情悅服而觀感興起比戶可
封矣爾等身叨鄉薦皆以古之孝廉相比擬何以克副
此孝廉二字且現經下第選期尚遠朕破格遴選授以
官職即論感恩圖報之常情亦當人人自奮况朕心實
仗爾等為朕教養斯民移風易俗以成一道同風之盛
爾等豈可薄待其身而為陋習所漸染私欲所牽制乎

爾等果能卓然自立不負選用朕自格外加恩倘拜命之初一時感激而涖官以後頓改初心則不但國典王章無可寬貸即清夜靜思亦應無地自容矣勉之勉之

四月癸巳

上諭內閣從來為政在乎得人書曰野無遺賢萬邦咸寧蓋賢才登進在位者多則分猷効職庶績自能就理而民生無不被其澤也朕即位以來加意旁求凡所以延訪擢用之道無不備至如現任官員及候補候選科目

諸人每特令薦舉遴選引見廣開錄用之途冀收羣策之力又念各省學校原以養育人材命學臣保舉賢能升聞於朝以備任使乃直省學臣所舉人數不多又或草率塞責不能副得人之實夫十室之邑必有忠信古者取人之法惟鄉舉里選合於三代之制今直省府州縣學貢生生員多者數百人少亦不下百餘人其中豈無行誼醇篤好修自愛明達之士乎著州縣官會同該學教官將貢生生員內居家孝友行已端方才可辦事

而文亦可觀者秉公確查一學各舉一人於今年冬底
申報該上司奏聞請旨或實無可舉者出具印結該督
撫查實奏聞朕因廣攬人材舉此曠典所以黜浮華而
資實用州縣教職為一方師長選賢薦能乃其專責倘
敢虛應故事濫舉非人照溺職例革職或徇情受賄則
當重治其罪八旗之滿洲蒙古漢軍亦照此例將人品
端方通曉漢文者著該佐領各舉一人如不得其人亦
具印結令該都統彙齊奏聞請旨庶使潛修篤行之士

得以表見而國家亦收得人之效矣

五月庚辰

上諭直省司道知府等朕惟治道之要莫大於用人督撫
經理地方必任用司道知府猶朕統御天下必任用在
廷諸大臣如廷臣不能實心任事則庶務之繁朕豈能
以一人獨理如司道府不能實心任事則屬員之賢否
民生之利弊督撫豈能徧悉而周知用人之關於治道
誠至重矣第人之才具不同心術各異用之有甚難者

彼司道府等官有一等姦巧之人督撫有所委託稍涉繁難謂非分內所應辦即逡巡退縮似此懷姦詭避而反沽不阿諛上司之名此人之不能為督撫用者也有
一種好事之人不安本分惟所欲為如遇無能之督撫則事無大小任其簸弄督撫為所把持而不能自主如遇有為之督撫則巧窺意旨百計投合督撫不覺入其彀中一任逞其私智此又督撫之用非其人也顧為督撫者勢不能不於所屬之司道府寄耳目委腹心必

將遴選其能任事者而委任焉人見其於稠人之中專任一二人則指為鑽營奔競甚至媒孽其短以為怙勢作威攬權納賄必致損敗督撫之聲名此等皆非公恕之論也且其人既為督撫所信任自當不取悅於同官不徇庇乎下屬銳意孤行無所顧惜其心有何攬權怙勢之可言哉論者不察其心從而媒孽之抑何不恕之甚乎朕以為人之行事所辨在公私是非之間而已向令此一二專任之司道府官果能秉公持正實心辦理

地方之事不特督撫資其贊助朕亦且嘉賴焉要之用
人有專任一二人者亦事勢有所不得已焉耳設使各
省司道府等官皆殫其宣力分猷之實則督撫何樂而
不多用也亦猶在廷諸大臣人人公忠體國則皆朕之
股肱心膂朕求之而不可得者又何取乎一二人之專
任哉但知人則括惟帝其難之彼為督撫者因屬員中
不能盡得其人而用之乃不得已而以耳目腹心專付
之於一二或有擇之不精用之不慎所託非人稍有所

覺即當警省改悔不可袒護飾非則無過矣朕實深悉
直省督撫用人之委曲復洞鑒直省司道府各官種種
情偽為此諄切曉諭俾各警惕猛省直省督撫務須仰
體朕意將屬員時加體察勿為宵小欺蒙朕自有遠照
斷不使若輩少有遁情夫天下上智下愚之人無幾惟
中材可與為善可與為不善者居多尚其敬聽朕訓共
勉為秉公持正實心辦事之人下不愧州縣之表率上
以不負督撫任用者不負朝廷則吏治蒸蒸日上措天

下於郅隆不亦美與

九月乙丑

上諭吏部凡縣令改授教職者因其不勝牧民之任例當
罷斥朕念其讀書攻苦選授一官不忍遽令廢棄是以
俾居師儒之席以展其所學此朕格外之恩也況教官
有化導士子之責較理民之任關係尤重應當殫心竭
力以盡職守倘因改授之故志氣墮頽奉職怠忽著各
省巡撫學政查叅議處

十一月乙卯

上諭吏部定例凡在京各部院官員因病告假回籍調理者病痊之日仍以原衙門補用至在外各官一經告病即令休致所以防不肖有司之託病規避也夫外官有地方之責患病不能辦事自應呈請離任但病痊之日格於成例雖有才具優長之員不得起用殊為可惜從前有府縣官員告病者朕降旨調來引見見其才尚可

用即命醫調治痊可仍行補用誠以人才難得雖片長

薄技不忍棄置也嗣後外官告病者著督撫查明確實具題令其回籍調治痊可有情願起用者於本籍起文赴部引見仍以原缺補用如此則可以杜規避之端而人才亦不至於淪棄矣

十二月丁亥

上諭大學士九卿等為治之道首重得人朕臨御以來夙夜孜孜廣為諮訪期得人材以理庶政而內外臣工所保舉之員其中秉公推薦足備任使者固不乏人而徇

私濫舉及苟且塞責者亦復不少朕思薦舉人材關係國家辨才論官之要道舉得其人則政事無不就理舉非其人則弊從此而生孟子曰立賢無方孔子曰舉爾所知觀聖賢之言則知得人道宜廣其途以為搜羅而各舉所知庶可以收克知灼見之益也今特諭內外諸臣等京官自翰林科道郎中以上外官自知府道員學政以上武官自副將以上旗員自叅領以上皆令各舉一人滿洲官員則保舉滿洲漢軍官員則保舉漢軍

漢人官員則保舉漢人文職官員許保武職武職官員
許保文職於滿漢文武內或係現任職官或係候補候
選之人或係進士舉人貢監生員或係山林隱逸務期
有猷有為有守品行才具足備國家之用者各人密封
奏摺赴奏事人員處轉奏外官則遣家人齎送密摺來
京付奏事人呈進即或親戚子姪等亦可據實薦奏不
必以嫌疑引避但京官如尚書侍郎外官如督撫提鎮
兩司皆係朕已經深知簡任者不必入所薦之列其奏

摺內只開列本人官銜姓名註明所薦之人官銜考語
不必引頌聖繁文此朕旁求俊乂之苦心冀賢才輩出
師濟盈廷俾百職得宜庶務畢舉凡有保舉之責者不
得瞻顧私交不得受人囑託不得互相商議不得輕聽
風聞夫十室之邑必有忠信凡人生平豈無一人熟識
深知者况既列朝紳受國家之爵祿而朕又推心置腹
畀以舉賢薦能之美事倘猶有懷藏私意濫舉非人者
清夜捫心尚可以為人乎且朕之觀人往往洞見隱微

將來觀所舉之人即可知舉人者心術之公私識見之明昧亦不使諸臣得以行其私也

雍正六年戊申四月丁未

上諭內閣凡辦理府州縣事務若得曾經出仕諳練之人於地方實有裨益朕愛惜人才於罷斥之員常降旨調來引見以觀其才具之優劣不忍令其棄置今思從前因公呈誤之員其中未必無才守可觀者著吏部行文各省凡知府同知通判知州知縣任內除大計特疏糾

叅外其因公累誤降革者該員曾經居官五年而離任之後交代清楚無錢糧案件未清之處准本人親赴吏部具呈吏部不拘人數即行奏聞考試履歷帶領引見候朕酌量起用起用之後若有貪婪不法再經叅出必嚴加治罪倘係平庸無能或行止不端之人妄自陳請希圖僥倖者亦難逃朕之鑒察

七月庚申

上諭內閣向來督撫赴任之時有奏請將平日所知人員

帶往以備委用者朕因督撫事務甚繁欲得素所熟悉之人以收臂指之效事屬可行是以允從所請令其帶往酌量題補近聞督撫等帶往人員在地方不甚相宜或羣相趨奉而指為上司之腹心或妄生議論而以為上官之偏袒其中弊端日生以致流言不少如楊文乾請帶王士俊殷邦翰前往廣東楊文乾信用之廣東闔省人心不服陳時夏請帶蔡益仁往蘇而江南之人指為陳時夏之耳目莽鵠立請帶朱亨衍李敏德傅樹崇

往陝西原為備辦軍需乃不令効力一事藩司孔毓璞
即逢迎巡撫以一人委署二缺而命往試用之員不行
委署此皆帶往人員不宜於地方者朕思所帶之二三
人其得力有限而沮衆人効力之心則為益少而無益
多况屬員之微愆小過上司本應曲體保全而既為督
撫帶往親信之人理當畏避嫌疑有不便格外保全之
勢亦非所以愛惜人才也且督撫等果公正精明善於
察吏則闔屬中豈無有廉幹之員可相信以心相資為

理者何必於帶往之一二人是賴而啟衆口之疑議乎
文官與武職不同武職以弓馬技勇為主有操練兵丁
差委巡緝之事督撫提鎮等將熟悉之人奏請帶往以
供使令可以得其効用之益至於文員則不應帶往從
前督撫等之奏請甚非朕亦不當允從其請除督撫已
經到任之後因本地要缺奉旨題補而本地不得其人
將別省舊屬題補者不必解任外如楊文乾陳時夏莽
鵠立及各省督撫大吏從前所請帶往之人目今現在

屬下者俱著回京請旨另用

十月癸未鑲黃旗蒙古副都統宗室滿珠錫禮條
奏京營叅將以下千總以上等員應叅用滿洲不
宜專用漢人

上諭曰從來為治之道在開誠布公遐邇一體若因滿漢
存分別之見則是有意猜疑互相漠視豈可以為治乎
天之生人滿漢一理其才質不齊有善有不善者乃人
情之常用人惟當辨其可否不當論其為滿為漢也自

金史卷之二十一
卷十三
我

太祖高皇帝開國之初即滿漢兼用是以規模宏遠中外
歸心蓋漢人中固有不可用之人而可用者亦多如三
藩變亂之際漢人中能奮勇効力以及捐軀殉節者正
不乏人豈可謂漢人不當用乎滿洲中固有可用之人
而不可用者亦多如貪賊壞法罔上營私之輩豈可因
其為滿洲而用之乎且滿洲人數本少今祇將中外緊要
之缺補用已足辦理若叅將以下之員弁悉將滿洲補

用則人數不敷勢必有員缺而無補授之人朕屢諭在
廷諸臣當一德一心和衷共濟勿各存私見而分彼此
在滿洲當禮重漢人勿有意以相遠始為存至公無我
之心去黨同伐異之習蓋天下之人有不必強同者五
方風氣不齊習尚因之有異如滿洲長於騎射漢人長
於文章西北之人果決有餘東南之人穎慧較勝非惟
不必強同實可以相濟為理者也至若言語嗜好服食
起居從俗從宜各得其適此則天下之大各省不同而

一省之中各府州縣亦有不同豈但滿漢有異乎朕臨御以來以四海為一家萬物為一體於用人之際必期有裨於國計民生故凡秉公持正實心辦事者雖疎遠之人而必用有徇私利已壞法亂政者雖親近之人而必黜總無分別滿漢之見惟知天下為公凡中外諸臣皆宜深體朕懷同寅協恭股肱手足交相為濟則國家深有倚賴久安長治之道必由於此也

庚子

上諭吏部國家政務必得其人而後理朕加意旁求多方
遴選惟期庶司百職俊乂在官以收得人之效但各職
需人之處甚多該督撫等又屢屢奏請而現在赴部銓
選之員不敷揀用因思自古人臣為國有以人事君之義
孔子論舉賢才之道亦云舉爾所知可見凡人平生必
有深知篤信之才足備朝廷任使者果其以公忠為心
自無薦舉不得其實之理也茲特降諭旨著京官大學
士以下主事以上之漢軍漢人外官督撫以下知縣以

上之滿洲漢軍漢人每員各舉一人除現任知縣以上
官員不必保舉外或係舉貢生監或係山林隱逸果有
品行才猷可備任使者即親戚子弟亦不必引避嫌疑
據實保舉至外官所轄之現任佐貳雜職等屬員亦准
其保薦朕從政務需人起見開誠布公以期集思廣益
內外大小臣工等共受國恩時懷報効自應秉公據實
以展臣子之心必無有徇私冒濫以自蹈欺罔者倘或
舉非其人將來覺察或試用不稱責有攸歸勉之勉之

雍正七年己酉四月壬辰

上諭內閣外任督撫藩臬為全省之表率關係甚重每當
簡用之時常以一時不得其人深勞念慮凡內外大臣
受國家厚恩均當留意於平時秉公奏薦盡以人事君之
道京官自學士侍郎以上外官自藩臬以上著各人密
保一人將其人可勝督撫之任或可勝藩臬之任據實
奏明不必拘定滿漢亦不限定資格即府縣等員官階
尚遠者果有真知灼見信其可任封疆大僚亦准列於

薦牘之內若一時無深知可舉之人准其從容採訪不得草率塞責有負諮詢

閏七月丙申

上諭吏部凡遠省烟瘴地方文武官員之缺例將本省熟悉風土之人調補朕思烟瘴地方大半係邊遠簡僻之缺若概行調補不令陞補未免強幹之員轉駐簡僻之所止圖挨俸無所表見而才具可用有志上進之人或生苟且因循之念亦未可定嗣後凡遇烟瘴地方文武

官員缺出向例調補者著該撫提鎮等於屬員內秉公酌量若有可以題陞之員即具題請旨陞授若係應調之員仍照舊調補陞調兼行不拘一格總期人地相宜材職相當以副朕鼓舞裁成之至意倘有應行調補之人不願前往而該管上司聽其規避者或有不應題陞之人而該管上司徇情題陞者經朕察出定行從重議處

雍正八年庚戌二月乙巳

上諭吏部為政之道務在得人朕加意旁求惟期賢才奮庸布列庶位百職修舉嘉惠民生凡所以遴選而登進之者亦多方矣雍正六年十月間以各處需員甚多而赴部銓選之人不敷揀用特降諭旨令京官大學士以下主事以上外官督撫以下知縣以上每人各舉一人送部引見今行之既已年餘而內外官員未經舉報者尚多則其平日必無深知灼見之人倘復展轉遲延必致人萌奔競之心而滋夤緣請託之弊所當酌量變通

者也現今會試中額廣至四百名其中必有可供任使之人而直省選拔貢生陸續來京亦可教導而成就之以備庶官之用著將各保一人之例停止若有已經到部者仍准其引見該部即行文在京各衙門并直省地方知之

三月己巳

上諭內閣朕愛惜人材不忍聽其限於考成遂至放廢而外任各官案件繁多往往罹於叅罰是以數年來因公

註誤之員例應降革者多於覆本之內降旨令該上司
出具考語送部引見若其才具稍有可用必再試以職
任而成全之雖片善寸長亦不肯輕棄也今思在京部
院司官及旗員等雖叅罰之案不多然亦有因公註誤
者所當一體加恩與以贖過自新之路嗣後在京文武
各官有因公註誤至於降革而任內無錢糧不清及治
罪之案者准照外員之例令該堂官該旗大臣出具考
語奏聞帶領引見或將該員仍留原任或另行試用或

照例降革候朕降旨裁奪

十月己酉

上諭內閣辦理軍需必得熟練之員方為有益陝甘二省
州縣官員備辦軍需有經手數年者有經手一二年者
似此熟練人員若因細過微瑕即行叅革則接任之員
初辦軍務未免生疎或至遲誤嗣後陝甘地方辦理軍
需之州縣官員若無大過其所犯情有可原者著該督
撫揆情度理量加寬宥若錢糧微有不清而事屬因公

者統俟大軍凱旋之後查核明白以定功過

雍正十二年甲寅七月丁丑

上諭吏部凡命往各省人員多係不應即選之人該督撫等自應先行差委試看果有勞績再令署印署印果優然後題補或該省懸缺需人一到即行委署更當留心訪察必實有政績可考方行題請實授嗣後題請實授者著將實在政績一一敘入本中題奏如果係卓越之才即不滿年限亦可聲明題請

大清世宗敬天昌運建中表正文武英明寬仁信毅大孝
至誠憲皇帝聖訓卷十三

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷十四

恤臣下

康熙六十一年壬寅十二月戊午

上諭吏部兵部王大臣等驗看革退人員內其武職官曾
在軍旅効力身經受傷雖年齒衰邁仍畱職銜文職官
除年老庸劣外若由進士舉人正途出身初選知縣即

以才力不及革退亦屬可憫嗣後將此等人員或改授教職或以原品休致著會同酌議定例遵行

雍正元年癸卯五月甲申

上諭直隸巡撫李維鈞據奏直隸虧空請計州縣官歲入所餘積累填補州縣官令少從容不慮窘乏方可責其盡心撫字少有餘貲亦可自為地方興利之舉何可勒令為他人補苴虧缺耶

十一月癸卯兵部以考選軍政具奏

上諭曰此係初次考選爾等秉公考驗內有出兵効力行走年老俸深者諸事尚能坐理仍著留任再人雖年老衰頽不宜留任而出兵効力之處甚多將伊即行革退致令無以度日深屬可憫應另行分晰具奏朕自加恩其雖無効力行間之處而供職年久者伊等身逢太平之世何由經歷戰陣爾等亦宜留心驗看

十二月甲子

上諭兵部國家保障封疆惟武臣是賴叅將以上責任尤

重其年老有疾不能辦理以致營務廢弛者自難姑容但其間或有久歷戎行曾著勞績者情亦可憫嗣後叅將以上有老病之員該督撫提鎮照例題叅仍將伊從前行間効力之處查明繕摺夾入本章內同送內閣奏聞朕酌加恩典以示篤念舊勞之意

雍正三年乙巳九月丁酉

上諭戶部朕體恤臣工時深軫念每思經理區畫以贍其俯仰之資查舊例在京大小漢官每年俸米俱支給十

二石蓋因向日漢官攜帶家口者少食指無多故給米十二石即可粗足今見漢官帶家口者多若俸米仍照舊數則日用或有不敷難免內顧之慮嗣後在京大小漢官著按俸銀數目給與俸米俾祿糈所頒足供養贍以示朕加惠羣臣之至意

雍正四年丙午二月壬午

上諭大學士等朱軾奏請解任開缺以終服制情詞迫切此乃伊名節所關朕知其出於至性誠懇允從所請解

任開缺以全其志但三年為時甚久卸事閒居在籍伊
心亦未必自安況目前現有畿輔水利之事正資料理
可於八月起身前來居住京師以備委任顧問不居現
任之職則與家居無異於禮既盡於心亦可安矣朱軾
素性誠篤今遭母喪深恐其哀毀過節爾等可將朕意
諄切諭之伊年高體弱不宜過於悲戚况六十不毀載
在禮經若能仰體朕心時思朕訓護惜此身為國家出
力伊母有知亦必深慰斯為忠孝兩全倘過哀以致毀

瘠則有負朕恩矣爾等並傳諭膳房侍衛永壽攜茶飯往賜

雍正五年丁未三月癸巳

上諭八旗都統等兵丁等喜喪之事俱已加恩賞給銀兩朕思大臣官員內有家貲饒裕者亦有家計艱窘者其於喜事尚可若遇喪事倉卒之間必致窘迫無措嗣後大臣官員內若遇喪事有情願借銀者著戶部借給四個月俸祿至下季扣除若於未及扣除之前有緣事革

職者除世襲官員外仍令其賠補如病故者著即賞給
免令賠補其行取戶部庫銀恐一時不能即得先將旗
下恩賞兵丁銀兩給與再行取戶部庫銀墊補

十一月丁卯

上諭兵部本營兵丁不得拔補本營千把前經高其倬奏
請部議准行數年以來朕留心體訪始知將此處兵丁
用為他處千把頗多未便蓋兵丁平日所管汛地其情
形險阻素所深知及用為千把諸事有駕輕就熟之益

若用往他處則初到之時一切茫然必待學習而後通曉此辦理公事之當籌及者也至於微員末弁安土重遷盤費居址措置匪易若令調換至數百里外必至拮据艱難有室家之累此又私情之當籌及者也朕思本營兵丁即為本營千把誠不能免於牽制瞻徇若於同城之中互相更換如係左營則用為右營前營則用為後營又如撫標鎮標之同城者亦可彼此更換庶於公私兩便其地方止有一營者或應於就近調補或應仍

照從前舊例著該部定議具奏

雍正六年戊申二月庚戌

上諭內閣吏戶兵刑工五部堂官今皆各殫厥職贊襄政
治共相黽勉矢勤矢慎端方自持剔除情弊杜絕請託
甚屬可嘉朕深許之夫大臣果廉潔自守其用度必稍
不敷朕因國家政事資藉大臣之力而使之分心家計
朕心不忍五部大臣內除差徃外省署印之人外俸銀
俸米著加倍給與其署理之大臣亦照此賞給若遇罰

俸案件將朕分外所給之俸不必入議

十一月乙亥

上諭戶部滇省邊鎮諸臣用度不敷朕深為軫念著將報明公件餘剩銀一萬三千兩全行賞給提鎮等官以為養廉若有贏餘令該提鎮酌為營伍公事之用以副朕眷念邊鎮之至意

雍正七年己酉正月庚戌

上諭吏部臺灣地方遠隔重洋全在道府廳縣各得其人

而該員又須熟悉風土情形殫心辦理於地方始有裨益向例文官俱以三年為滿後經原任總督滿保條奏將三年任滿之員加銜再留三年所以慎重海疆俾諳練之人久於其任也今據總督高其倬摺奏臺員以六年為滿而調任之時渡海而往即須數月任滿之後候缺挨陞以及交盤渡海又或一二年不等是前後合計須八九年且臺灣之例不帶家口其父母妻子隔越海洋未免有所牽掛應否請以四年為滿等語朕思臺灣

道府廳縣等官自宜選用熟習諳練者然定期六年為滿又加以候缺交盤渡海之期實為太久今再四思維臺灣文員自到任之日為始將滿一年之期著該督撫於閩省內地官員內揀選賢能之員乘冬月北風之時令其到臺新舊協同辦理半年之內大約可以熟悉地方情形則令舊員乘夏月南風之時回至內地補用將來接任之員俱照此更換該員到臺協辦之時俱一體算俸并給與俸銀及養廉之項如此則該員在臺前後

不過二年為期甚近而更換之員先往協辦又可習練
地方事宜似有裨益其道府大員作何請旨揀選同知
以下等官作何銓選調補及量加議敘之處該部詳悉
妥議具奏

三月甲戌

上諭內閣在京官員歷俸六年准其告假省親此乃通行
之常例為伊等父母居家無事願歸定省者而言若其
父母身患疾病或年過七十精力衰憊為子者迫欲回

家侍奉以伸其孝養之忱則非可以年例拘也嗣後在京官員有聞其父母患病急欲省覲或父母年逾七十而衰憊者俱不必俟六年俸滿著取具同鄉官印結於本衙門堂官處具呈該堂官查明啓奏請旨給假速回本籍不必由吏部彙題其歷俸六年告假省親者仍由吏部題奏將此永著為例

九月辛巳

上諭戶部外任大小官員罰俸之例如罰俸一年者則將

本年應領俸銀扣抵若再有罰俸之案則勒限一年追出俸銀解部如一年不完又罰俸一年展轉增加常有因一二年罰俸而積至數年或數十年者此例不甚妥協在罰俸多案之州縣與力薄難完之微員深為可憫著該部通行各省凡有此等罰俸之員倘力不能完即將伊任內應得之俸逐年扣抵不必勒限追繳又定例凡有休致革職病故之官員其應追罰俸銀兩俱行豁免惟江南等省有休革等事只將虛俸豁免其在罰俸

以前食過之俸仍行追出直省例不畫一今著將休致病故官員食過之俸槩行免追其革職之員則追其食過之俸以示懲儆直省一體遵行

十二月戊申

上諭內閣康熙五十九年陝省解送駝馬進藏文武官五十員每員借支肅州公庫銀五百兩為行裝路費之資本係應給之項因當時該督撫未經題報不敢作正項開銷是以各員回陝之時仍於各名下著追補項至今

尚有未完銀一萬六千八百兩朕念伊等効力戎行遠涉藏地雖非衝鋒破敵者比而間關行役亦屬可憫著將未完銀兩槩行豁免其已完者悉給還本員或交伊之的屬如該員有別項虧欠應追者即准其抵補以示優恤勞役之至意

雍正八年庚戌三月戊寅

上諭內閣各省駐防官員嗣後有効力年久因老辭職者著該將軍等將伊食俸披甲之年及在行間効力之處

聲明咨送兵部奏聞候朕閱看其應加恩者照在京旗員例加以恩施

庚寅

上諭吏部查例載官員失察衙役犯贓十兩以上者革職朕思胥役衆多一官之耳目難於周遍倘知而故縱自當從重處分若但失於覺察即將本官罷黜則賢員因此誣誤者不少矣情有可原而處分太重轉易滋隱匿之弊此應加通變者該部其悉心詳酌另行定例具奏

七月癸酉

上諭兵部舊例武弁給與親丁名糧以為養贍僕從家口之需前朕聞弁員等離任時即將隨丁名糧召募補足而接任之員陸續候缺每至數載不得養贍之資甚為艱窘已特降諭旨嗣後武弁去任者將所有名糧不必募補留與接任之員俾其得需餘潤此無非體恤貧員給與養廉以免扣剋虛冒苦累兵丁之弊也近聞武弁等若有陞遷事故者於該員離任之日即將隨丁名糧

按數開除其住支銀米歸作截曠項下彙報充餉俟新任之員到日方許申報起支朕思署事之員不無往來車馬食用之費且各營署事多係部發候補試用之人竝無俸薪等項應為籌畫養贍之道嗣後武弁去任之時其親丁名糧照舊存留不必歸入截曠項下其署事之員若係候補試用者准其全行支給以作養廉若係現任之員兼理者准其支給一半將一半留在本營以為修葺衙署添補器用之費即交該營守備存貯如有

動用之處每季造冊申報該上司查核著各直省一體遵行

九月丁卯

上諭內閣昨因京師地震凡兵民等屋宇傾圯者已降旨詳查賞給銀兩以為修理之費而滿漢大小官員等亦俱有修垣葺屋之事朕心軫念著將各部院衙門官員八旗都統副都統統領叅領佐領驍騎校護軍校等以及上衙門之世襲官上三旗侍衛內務府官員步軍統

領衙門等官巡捕三營官弁每人俱賞給半年之俸

十月壬子

上諭內閣向因大興宛平二縣近在輦轂之下常有速辦之公事不得不那移庫銀以濟用而上司察知每以虧空題叅至於罷黜治罪實為可憫用沛特恩於大宛二縣各發庫銀一萬兩存貯該縣倘遇有速辦之公事准其詳明府尹動支應用此朕體恤有司之至意也近思辦理軍需之州縣其急切應付之處不容刻緩而該州

縣竝無存貯備用之項若擅動公帑又干嚴譴有司實處兩難不可不為籌及朕意欲於辦理軍需及事務繁劇之州縣亦做大宛之例酌留帑銀以備急切公事之用其如何舉行俾辦公有賴而弊竇不生著大學士會同大將軍岳鍾琪總督高其倬悉心定議具奏

雍正十年壬子六月戊辰

上諭辦理軍機大臣等前派往西北兩路出征之滿洲蒙古漢軍大臣官員等於起程之時朕令寬裕給與跟隨

人數其家中隨甲銀米仍留為該員家口養贍之資竝未令其裁革頃聞戶部於本年三月間行文各處以各員在外既有隨甲則家中不應重領銀米將各員隨甲銀米停其支領且自雍正七年大兵起程之日為始凡家中領過銀米於本人應領俸銀俸米之內照數坐扣還項該部因慎重錢糧之意竝未請旨遽爾通行甚屬錯謬殊非朕體恤出征人員之本意今特頒諭旨凡軍前之大臣官員等家中已領之隨甲銀米不必扣還其

應領之項照常給與竝將此旨通行各處軍營知之

雍正十一年癸丑七月戊戌

上諭內閣據倉場總督兆華疏報六月二十二三等日雨水連綿河流驟漲天津一帶糧船多有浸濕漂損等語今年伏雨稍多河流驟漲以致損壞漕船尚非運官旗丁疎忽之咎其漂失米石免其賠補損壞船隻亦免賠修運官亦不必議處此朕體恤寬大之恩倘將來運官旗丁等因此番寬典不知加意隄防或有捏報巧飾等

弊一經察出按律治罪

大清世宗敬天昌運建中表正文武英明寬仁信毅大孝
至誠憲皇帝聖訓卷十四